

皇朝藩部要略

皇朝藩部要略卷之六

前史官壽陽 祁韻士 纂

寶山 毛嶽生 編次

江陰 宋景昌 校寫

平定 張穆 覆審

外蒙古喀爾喀部要略四

七年

御題詩扇賜策凌札薩克圖汗格埒克延丕勒卒子巴勒達爾新襲郡王爵來朝

諭曰札薩克圖汗號尙未承襲已召郡王巴勒達爾偕

原封札薩克圖汗策旺札布兄孫輔國公多岳特入覲。朕思策旺札布身獲重譴，兼乏子嗣，而格埒克延丕勒自襲汗以來，効力軍營，甚屬奮勉。其子自應承襲，況多岳特又非應襲汗號之人。其札薩克圖汗仍著郡王巴勒達爾承襲，尋授盟長。車臣汗部札薩克輔國公車稜旺布以老罷，子台吉格埒克襲。

八年，青衮咱卜以怠玩爲額駙策凌所劾。

諭曰：朕聞青衮咱卜凡事怠惰，並不赴軍營效力。去歲察閱所部防秋兵，伊係副將軍，所屬兵丁器械全不整飭。又將伊本身開入軍營行走之列，希圖雙俸，經策凌

察出除名。嚴行訓誡。喀爾喀副將軍。有統轄全部之責。爲眾蒙古表率。豈可稍有怠玩。苟且因論策凌傳旨詢問。伊俯首無詞。理應治罪。但既自知其罪。姑行寬免。飭令嗣後加意奮勉。效力贖罪。

賜札薩克圖汗部一等台吉額琳沁。公品級。

命轄烏梁海降眾諸部扈

駕木蘭行圍。

詔車臣汗部札薩克台吉貢楚克札布。以兵五百赴庫倫護視哲卜尊丹巴呼圖克圖。貢楚克札布固魯札布長子也。尋以哲卜尊丹巴呼圖克圖擅赴額爾德尼昭。

敦丹多爾濟未經勸阻

諭責之格埒克以解駝馬遲誤爲所部副將軍札薩克
輔國公巴蘇所劾

詔削職子索諾木敦多布襲車臣汗部台吉旺札勒札
布駐防鄂爾坤攜械濟兵

賜孔雀翎是年敦丹多爾濟卒弟敦多布多爾濟襲

九年車臣汗部多羅郡王貢格三丕勒卒貢格三丕勒
車臣汗垂札布弟雍正末垂札布由札薩克郡王代車
布登班珠爾爲車臣汗貢格三丕勒襲所遺札薩克郡
王爵及垂札布子德木楚克襲札薩克郡王

詔貢格三丕勒仍爲郡王不兼札薩克至是理藩院議停襲

諭曰貢格三丕勒所授王爵本係額外加恩又未奮勉效力理應照議停襲但伊素係郡王今因身故遽爾削除朕心殊覺不忍著加恩授其子丹津爲多羅貝勒十年命土謝圖汗部札薩克和碩親王額璘沁多爾濟督理俄羅斯邊境事

十二年策凌入覲

優資遣歸

授土謝圖汗部札薩克和碩親王額璘沁多爾濟所部

副將軍赴塔密爾駐防

十三年授土謝圖汗延丕勒多爾濟爲盟長及所部副將軍偕哲卜尊丹巴呼圖克圖督理俄羅斯邊境事諭令諸部選配駝五百運歸化城米赴塔密爾軍營並留兵駐防尋延丕勒多爾濟偕眾札薩克議軍營臺站爲護牧設兵糧業蒙恩賞至歲需牲畜願照數公捐無庸由收厰運送策凌代奏

允之厄魯特降人達什哈脫歸布拉罕札薩克一等台吉乾清門行走達什丕勒擒之

詔賚幣并

賜戴孔雀翎。札薩克圖汗巴勒達爾所屬有多爾濟者。匿厄魯特。逃入察岱。歲餘。巴勒達爾始縛獻。策凌劾其不嚴緝賊罪。

詔免議。青衮咱卜請以其叔父公品級一等台吉額璘沁。別授札薩克。

許之。

詔授車臣汗部郡王德木楚克署盟長。德木楚克垂札布長子。

十四年。旺札勒札布捐貲造矢千。送軍營。并以羊四千餘給兵。

諭曰旺札勒札布前因屢助軍需授一等台吉今復備辦軍器協濟口糧感恩效力殊可嘉尙著加恩授札薩克烏梁海降人巴黨遁有烏勒木濟者馳告旺布多爾濟追至貢贊伯勒齊爾盡擒還理藩院議雖擒獲究因疏懈所致停敘功

上以旺布多爾濟聞信疾追奮勇可嘉

賜幣旺布多爾濟額璘沁子尋授二等台吉

十五年春二月額駙策凌薨訃至

上軫悼

諭曰定邊左副將軍固倫額駙喀爾喀大札薩克和碩

超勇親王策凌以名藩尙主班崇懿戚在
聖祖仁皇帝時卽已宣力邊陲勦猷茂著

世宗憲皇帝眷注優隆晉爵親王任專閫外身先血戰
殄靖狡寇偉績丕昭益勤忠藎朕以王爲兩朝勲舊倚
毗彌殷寄重長城倍加渥澤前聞邁疾遄命賜藥選醫
令伊次子車布登札布馳驛侍奉復遣乾清門侍衛德
山前往存問方期漸就痊可忽聞溘逝深爲軫惻著加
恩賜銀一萬兩治喪卽命德山往奠茶酒允伊遺奏合
窆固倫純愨公主園寢著伊長子成袞札布扶柩來京
俟到京日朕親臨奠輟所有應行典禮俱照宗室親王

例考諡建碑具如儀式自昔功臣勲戚侑食廟庭以王之功宜配享

太廟雖蒙古親藩從未有與配享者朕以王功在王室名勒旗常簡在久孚宜膺特典且令眾蒙古知朕崇獎賢勞中外一體俾共知感奮益切勸勉并照和碩怡賢親王例崇祀賢良祠永垂秩祀以示朕酬庸展親優賢篤舊至意賜諡曰襄

御製七言詩悼之有不必讀書知大義每於臨陣冠三軍之句命成袞札布襲札薩克和碩親王兼授盟長策凌子八列譜者六長成袞札布次車布登札布封札薩

克郡王次蘇巴什里次札木禪多爾濟均封公品級次額琳沁多爾濟授一等台吉追封公品級六月諭曰額駙超勇襄親王策凌爲國家竭誠宣力

世宗憲皇帝授以定邊左副將軍重任訓兵飭備準夷懾服喀爾喀賴以甯謐實爲勲戚重臣不意溘逝所遺缺甚屬緊要簡任務在得人成袞札布係伊長子前在軍營懋著勞績才具實堪勝任雖此非世襲之職而因才器使有所弗拘著授爲定邊左副將軍務益勵忠勤勉成父志以副特簡毗任之意車臣汗部札薩克輔國公巴蘇卒於塔密爾軍營

上念其宣力有年

軫悼賜卹子達爾濟雅襲

十六年三月成袞札布奏守汛弁兵私與界外回眾互市致爭請嚴鞠之

詔勿株連嗣後嚴禁青袞咱卜坐縱屬私與準噶爾互市罪削爵

諭曰青袞咱卜縱所屬人私出汛界與準噶爾回眾貿易以致潛居烏梁海甚屬疏懈且於特諭擒解之喇嘛札木闡尙未解到怯懦推諉深負朕恩著革副將軍及札薩克貝勒爵朕觀額琳沁人材出眾著襲札薩克多

羅貝勒。但念青衮咱卜。係博貝長孫。一旦全削。朕心殊爲不忍。著卽以額琳沁所遺公品級。札薩克台吉職。令其調補。

詔額琳沁。議定烏梁海出入汎界例。并飭禁所部越境與準噶爾及回眾私市。授土謝圖汗部郡王成衮札布子齊巴克雅喇木丕勒副盟長。授賽因諾顏部親王達什特多札布次子德沁札布所部副將軍。尋授副盟長。九月。回眾至伊都克汎。仍乞市。成衮札布檄守汎侍衛。飭勿再至。復遣土謝圖汗部札薩克車布登往驅之。又至札薩克額木根牧乞市。

諭遣還。授策凌次子車布登札布所部副將軍參贊。
十七年三月。賽因諾顏親王成袞札布率兵三千環屯
塔密爾軍營。土謝圖汗部札薩克琳丕勒多爾濟亦率
兵駐防塔密爾。

詔授札薩克圖汗部貝勒額琳沁所部副將軍參贊。與
汗巴勒達爾各以兵三千隨副都統達青阿駐防鄂爾
海喀喇烏蘇。車臣汗嘛呢巴達喇率所部兵四千駐防
巴顏烏蘭。賽因諾顏部親王德沁札布偕土謝圖汗部
郡王齊巴克雅喇木丕勒率兵千駐防錫喇烏蘇。十二
月成袞札布來朝。奏每年鄂爾坤及烏里雅蘇台駐喀

爾喀防秋兵二千。四部各有備用兵。札薩克圖汗部千。賽因諾顏部二千。土謝圖汗部四千。俱在游牧預備。距軍營近僅數日。遠亦不過旬餘。若盡調烏里雅蘇台糧馬。由各部派給。將滋累。請仍居本游牧聽調。

從之。成袞札布請析屬。令其弟車布登札布自爲一旗。詔允其請。

十八年。達什丕勒。巴勒達爾。德沁札布。各獻駝馬助軍。並得紀錄。授嘛呢巴達喇爲盟長。

詔車臣汗部札薩克旺舒克達爾札長子貢楚克。赴庫倫駐防。杜爾伯特合吉。車凌車凌烏巴什。車凌蒙克等。

攜眾降。成袞札布率車布登札布格埒克巴木不勒。車
木楚克札布等。各以兵千。赴烏里雅蘇台。防準噶爾追
兵。有宰桑禡木特者。引兵二百來追。馳由巴顏珠爾克
博托和尼溝往。揚言其部台吉噶爾藏多爾濟阿睦爾
撒納將至。車木楚克札布偵知之。遣報成袞札布發兵
援。而自赴車凌車凌烏巴什所。令速徙烏里雅蘇台。車
凌蒙克後至。復令由庫密固爾河入西爾哈瀚海以避。
上諭勿縱禡木特還巢。禡木特逸。

嚴旨詰責。

詔車木楚克札布。偕沙克都爾札布等。以兵二千。赴卓

克索駐防。

賜雙眼孔雀翎。賽因諾顏部札薩克輔國公巴圖蒙克，偕同部領國公貢格敦丹等，率兵千，赴烏里雅蘇台駐防。防護杜爾伯特降眾達青阿檄諸部兵，追緝擅入內汛之宰桑禡木特。成袞札布檄額琳沁，偕車臣汗部公格埒克巴木丕勒助之。額琳沁以馬疲弗至。禡木特逸。成袞札布劾其逗留，應削職。

諭曰：額琳沁原係二等台吉，朕因其人才出眾，行走奮勉，授一等台吉。復賜公品級。嗣因伊兄子青袞咱卜獲罪，奪貝勒爵，令額琳沁承襲。伊自宜感激隆恩，益加奮

勉乃奉將軍調遣。託故不前。理應治罪。但念伊父博貝。舊有勞績。仍賞公品級。留軍效力。其貝勒爵。仍以青衮。咱卜襲之。伊等若知朕恩。效力自贖。朕亦不究前愆。否則必重治其罪。并有

詔責成衮札布。及車木楚克札布。飭偕達青阿。擒賊自效。馮木特尋就擒。復釋還。札薩克圖汗部二等台吉達什朋素克。隨參贊大臣薩拉爾。擒私入科布多汛之烏梁海人札木闡等。

獎資幣。尋偕賽因諾顏部貝勒沙克都爾札布等。招降札哈沁宰桑馮木特屬。達什朋素克父圖巴。以克爾森

齊老之役，援剿不力，削輔國公爵。達什朋素克從軍數有功，額駙策凌薦其才，乃授台吉職。

命車臣汗達瑪璘長子嘛呢巴達喇爲盟長。

十九年正月。

詔土謝圖汗札薩克郡王車稜拜都布，赴烏里雅蘇台軍營。齊巴克雅喇木丕勒德沁札布等，率錫喇烏蘇備調兵，赴烏里雅蘇台附近駐防。二月，烏梁海人博羅特瑚圖克等，擅入汎界。土謝圖汗部札薩克輔國公巴木丕勒多爾濟次子車登三丕勒，隨參贊大臣薩拉爾擒之有。

詔獎諭薩拉爾遂由崆格進屯卓克索招撫烏梁海青
衮咱卜額琳沁等並率兵從旋追擒禡木特黨札木聞
等額琳沁尤奮厲薩拉爾以聞

詔封輔國公二月

諭成衮札布曰前因軍營無事額駙策凌年老就近以
塔密爾作爲軍營今有辦理烏梁海之事軍營應移駐
烏里雅蘇台以塔密爾作爲內地尋與尙書舒赫德議
防秋

詔來京面授方畧

三月以收撫烏梁海

詔桑齋多爾濟署所部副將軍。偕車布登率諸部兵親隨成袞札布駐防鄂爾海喀喇烏蘇。尋偕參贊大臣安崇阿德甯等移駐庫克嶺。以車稜屬被賊劫。又

詔達什丕勒率兵五百往護之。夏額璘沁多爾濟奉

詔購駝馬。丹津督解。由翁吉達什和碩解崕格札布堪飼收備用。車臣汗部札薩克輔國公格埒克獻馬助軍。得紀錄。同部台吉車稜多岳特獻馬五百助軍。紀功晉一等台吉。車木楚克札布又購馬六千解軍。馬用備足。命貢楚克札布解馬赴庫克納塔爾飼收。

命丹津督解駝馬。至翁吉達什和碩。四月罷成袞札布

定邊左副將軍職

命赴額爾齊斯督屯田。賽因諾顏部台吉齊旺多爾濟獻馬。請從攻達瓦齊。

許之。又念其前經獻駝馬助軍。

賜公品級。六月。參贊大臣烏爾登調貢格敦丹赴察罕。札拉烏魯格依諾爾駐防。尋

召入。

覲。秋七月。新降杜爾伯特台吉車稜蒙克子巴朗攜眾由庫克嶺叛逃。達什丕勒率巴勒達爾兵追擒其餘黨。車布登懼罪。以追捕弗及奏。

諭曰車布登與安崇阿德甯同駐庫克嶺專爲防範逃
眾乃巴朗從此脫逃伊等率兵尾追並不奮勇前進卽
行退歸安崇阿德甯二人著卽正典刑車布登削貝勒
爵降授貝子仍留軍營效力贖罪晉封達什丕勒爲輔
國公又

諭曰達什丕勒護視杜爾伯特游牧甚爲妥協今一聞
巴朗逃遁卽率兵追斬餘黨奮勇出力朕甚嘉之著加
恩封輔國公以示獎勵
賜巴勒達爾冠服及幣

諭仍駐巴雅特輝特台吉阿睦爾撒納來降

詔琳丕勒多爾濟隨德沁札布移所攜降眾于塔密爾留兵防護尋由塔密爾移置固爾班舒魯克設汛防護檄貢楚克札布守塔密爾軍倉九月青衮咱卜土謝圖汗部札薩克台吉三都布多爾濟各以兵千隨參贊大臣努三等赴阿勒和碩偵烏梁海宰桑赤倫遁吹河乃率兵由喀喇莽奈直抵所居降其眾四百四十五戶徙所屬台吉班札喇克察於特斯偉袞安置之薩拉爾又率額琳沁車布登札布貢格敦丹車木楚克札布等剿撫烏梁海宰桑達克車根等于察罕烏蘇尋復擊宰桑禡木特及通禡木特降之既命額琳沁率兵二百赴圖

蘇爾勒軍營聽調。

命車木楚克札布隨參贊大臣烏爾登赴塔本托羅海駐防。

召貢克敦丹入

覲。十月班第奏貢格敦丹從努三駐防齊克諾爾請緩覲期。

允之。敘功得紀錄并賚幣。十一月敘功晉封青衮咱卜郡王品級。復授所部副將軍。札薩克圖汗部札薩克台吉根敦由塔密爾移駐哈喇阿濟爾罕。

授土謝圖汗部札薩克額璘沁多爾濟爲西路參贊大

臣。

二十年正月。大軍進剿準噶爾達瓦齊。分西北兩路。以班第爲定北將軍。阿睦爾撒納爲定邊左副將軍。副之。陝督永壽爲定西將軍。薩拉爾爲定邊右副將軍。副之。格埒克巴木丕勒。督解駝馬。悞遲。班第劾奏。

詔削副將軍。及輔國公爵。從軍贖罪。札薩克台吉成袞。札布。由烏里雅蘇台。赴阿魯博爾濟巴顏濟魯克。督解駝馬。

獎賜佩飾。賽因諾顏部。札薩克台吉賚充札布。捐馬助軍。

命赴科布多督牧務。車稜多岳特獻馬六百牛百羊千濟軍。

詔封札薩克輔國公。二月成袞札布請隨征。

詔暫駐烏里雅蘇台。俟大軍行。偕護軍統領塔爾瑪善往督屯田。時軍營所用馬由喀爾喀購未至。成袞札布恐後期。檄由烏里雅蘇台督解科布多。札薩克圖汗部輔國公多岳特私攜所解馬歸牧。

詔削爵。仍解馬贖罪。三月將軍班第率大軍赴伊犁。青衮咱卜引兵先進。

賜三眼孔雀翎。烏里雅蘇台辦事大臣哈達哈檄根敦

選兵五百分巡海喇圖庫列圖哈道里科布多布延圖等處與駐防烏哈爾和碩之公品級諾爾布札布互爲聲援巴雅爾什第偕賽因諾顏部札薩克輔國公巴圖蒙克將駐防烏里雅蘇台兵三千爲伊犁大軍聲援有急則繼進尋馳兵二百降穆哈賚得秦七十戶

賜幣及佩飾巴圖蒙克旋以疾卒于軍子丹巴旌準襲額琳沁從征行至松樹塘病卒

論曰額琳沁所封輔國公原非應襲之爵但念伊雖未至軍營中途溘逝亦屬可憫著加恩以其子旺布多爾濟襲時旺布多爾濟隨永常在西路軍先行桑齋多爾

濟等率輕騎繼進。車木楚克札勒由巴里坤至珠勒格圖。偕杜爾伯特公瑪什巴圖等以兵三百前行。擒準噶爾宰桑伊勒巴爾屬復奉薩拉爾檄。偕阿拉善貝勒羅卜藏多爾濟。杜爾伯特貝勒色布騰益兵七百。招降札哈沁宰桑敦多布布魯古特台吉諾海奇齊克輝特台吉敦博勒達克噶勒雜特宰桑哈薩克錫喇等謀達瓦齊居格登阻伊犁河。疾引兵由博羅塔拉赴哈塔濟勒渡。車布登札布亦偕台吉達什由察罕呼濟爾至集賽擒宰桑齊巴漢以三百騎疾馳至。遂奪其舟渡大軍。合兵進擊。達瓦齊遁。諸將分路追捕。獨車布登札布率同

部兵追至沙喇雅爾嶺而還。四月，成袞札布屯田兵由額爾齊斯移駐伊蘇圖鏗格爾。七月，班師屯田兵撤還。尋烏什阿奇木伯克霍集斯擒獻達瓦齊。阿睦爾撒納偕副都統額爾登額以兵五百由穆色爾嶺往取械達瓦齊詣軍。青衮咱卜偕賽因諾顏郡王納木札勒齊素龍等收達瓦齊游牧，獲其孥屬，並喇嘛六千餘。阿睦爾撒納謀據伊犁，潛與其黨納噶察貽書哈薩克汗阿布賚，詭言統領蒙古漢兵駐伊犁，車布登札布責納噶察曰：爾等匿奉

天子命，反若自統兵至，可乎？納噶察不從。車布登札布

告班第。飭易書。且密陳阿睦爾撒納擅奪宰桑鄂勒錐駝馬。藉稱防禦。哈薩克及布魯特。私調兵九千。駐各路。諸狂悖狀。班第具以

聞。蓋阿睦爾撒納謀逆。同事者多不之察。獨車布登札布發其奸。頃之。

詔偕其兄齊木庫爾等入

覲。班第由尼楚袞軍營。遣額璘沁多爾濟等護之行。齊木庫爾窺阿睦爾撒納叛跡已著。密勸額璘沁多爾濟擒之。弗從。行至烏隆口。以將軍印授護行。稱歸牧治裝。額璘沁多爾濟信之。遣琳丕勒多爾濟從二十餘騎送

歸至察罕郭勒阿睦爾撒納麾所部兵三百還攻琳丕勒多爾濟等被圍拔矢還射奮勇鬪賊不敢逼奪路走歸遇其後隊邀擊之獲阿睦爾撒納所用旗纛甲冑賊遂由額爾齊斯河馳遁額璘沁多爾濟追之不及時桑齊多爾濟攜索倫札哈沁兵千自伊犁還卽馳赴額爾齊斯收將軍印擒賊黨阿喀察定進等檄沿途汛兵護軍需并防新降厄魯特眾三都布多爾濟以督辦軍需駐烏里雅蘇台聞叛隨駐劄大臣阿蘭泰等馳赴札布堪擒阿逆孛及其黨班珠爾札木禪等時固爾班和卓等賊眾千餘戶潛通烏梁海誘同逃大軍猝與遇分路

掩擊盡誅之先是

上預知阿逆中途必叛

密諭班第選軍中威望大臣監送班第奏額璘沁多爾濟老成可任

上以其人小有才不更事

飭諭班第至是果僨事

諭曰逆賊阿睦爾撒納已叛遁額璘沁多爾濟率兵追捕量亦無濟著與齊木庫爾等過行入

覲及至議削爵論斬

諭曰額璘沁多爾濟以札薩克親王參贊大臣膺監送

阿睦爾撒納之任齊木庫爾以逆謀既著勸速擒治乃恬不知警反以彼雙親王我單親王不敢便宜從事爲辭致逆賊免脫夫旣爲國家叛賊何何雙親王之足論且逆賊公然授印率眾徑行何至逾日始遁去領兵追捕業已無及試思此何等事而有心貽悞至此其心尙可問乎核其情罪萬無可逭但念乃祖乃父夙著勤勞朕尙不忍加以顯戮令其自盡于是停襲王爵

詔獎琳丕勒多爾濟之勇封輔國公

賜孔雀翎并

賚白金授三都布多爾濟公品級

晉桑齊多爾濟親王爵

諭曰桑齊多爾濟以一少年奮勇效力甚屬可嘉其祖丹津多爾濟本係親王著加恩晉襲原爵以車布登札布先發逆謀晉封多羅貝勒班第之剿達瓦齊于伊犁也道出阿爾台以烏梁海潛附準噶爾遣車布登沿途剿捕至固爾班鼐塔克及烏蘭布拉克喀喇哈巴地遇烏梁海副都統察達克屬得木齊綽罕宰桑圖布慎屬得木齊喀喇曼濟等眾盡降之並獲巴朗從賊二百餘戶師旋車布登偕副都統敦多卜率兵三百由薩噶勒巴什嶺往收汗烏梁海汗卽烏梁海所居地也宰桑郭

爾卓輝鄂木布及布魯古特宰桑根都什特楞古特宰桑瓜齊楞皆率眾降青衮咱卜又招降宰桑齊巴漢等自是烏梁海地畧定編新降旗分補授總管以青衮咱卜習烏梁海情

命總轄之先是巴朗叛逃青衮咱卜追至和通鄂博率兵還言巴朗由西路額琳哈畢爾噶遁故追不及至是巴朗就擒青衮咱卜言盡妄

諭責之五月副都統齊旺侍衛圖倫楚納木札勒齊素隴各以兵追緝叛賊巴朗就擒札薩克圖汗部台吉齊巴克札布偕宰桑烏勒木濟械送京師

賜孔雀翎。尋赴烏里雅蘇台聽調。阿逆黨克什木巴、蘇
秦都噶爾、擾伊犁。班第遇害。車稜拜都布、旺沁札布、貢
格敦丹擊之。弗克。車稜拜都布、旺沁札布皆陣歿。土謝
圖郡王齊巴克雅喇木丕勒方由烏蘭呼濟爾運軍糧。
馳援力戰。被執不屈。格埒克巴丕木勒車布登齎敕往
諭噶爾眾。被創亦爲所留。札薩克圖汗部輔國公多爾
濟車登賽因諾顏部協理台吉多爾濟均被執。多爾濟
車登脫歸。多爾濟留養於宰桑托克托博羅特家。有達
瓦藏布者。阿逆族也。邀于路。復執之去。或言已降賊。
命削爵嚴緝治罪。時定西將軍策楞引大軍復赴伊犁。

貢格敦丹突圍出偕協理台吉博爾綽對由珠勒都斯問道至軍

上念喀爾喀諸札薩克隨班第留駐伊犁猝遇叛賊以兵寡被圍

詔策楞傳旨慰諭令歸游牧示恤貢格敦丹跪言世受國恩無可圖報願擊賊自效策楞代奏

許之尋烏梁海逸賊戕守汎侍衛貝多爾時齊巴克札布率兵駐防奇爾吉斯諾爾卽偕根敦往捕至察罕烏蘇遇青衮咱卜自伊犁歸與合兵赴巴斯庫斯收撫烏梁海時舊屬準噶爾之烏梁海散居汗哈屯等處青衮

咱卜宣揚

上命。於是宰桑哈爾瑪什、瑪濟岱、納木札勒、保袞、莽噶拉克、納穆克布、珠庫鄂木等相繼降。敘功。車布登封多羅貝勒。齊巴克札布。公品級。

授德木楚克所部副將軍。偕副都統納木札勒。由塔密爾。徙輝特和碩特降眾于固爾班舒魯克。防護之。八月。阿逆煽包沁部眾。總管阿克珠勒。副總管台拉克。和濟木呼哩等。叛應之。由索勒畢烏拉克沁。踰阿爾台。掠首汛侍衛齊微布。台吉達瑪琳等牧產。成袞札布檄貢格敦丹。以兵四百。赴哈達青吉勒。與協理台吉圖巴札布。

察哈爾叅領博碩郭勒等追擊之。駐臺大臣阿蘭泰檄會剿車臣汗部札薩克巴雅爾什第偕達爾濟雅馳赴布拉罕路擊斬台拉克和濟木呼哩擒阿克珠勒俘其眾以所獲還齊徹布等。

詔嘉之。晉封巴雅爾什第和碩親王。達爾濟雅固山貝子。

命巴雅爾什第赴科布多布延圖駐防。達爾濟雅由都固稜赴索勒畢烏拉克沁駐防。時包沁餘賊有竄伏烏隆諸界者。達爾濟雅偕副都統札爾杭阿等以兵千餘由阿爾台烏蘭嶺分捕至額爾齊斯庫克托輝盡擒之。

布庫努特罕桑敦多克曼集等附逆。車木楚克札布偕
台吉唐古特追擊之。誅其眾。復乘勝與旺布多爾濟剿
叛黨阿巴噶斯哈丹等游牧。

詔嘉其功。

賜三眼孔雀翎。

諭隨策楞由博囉塔拉復赴伊犁。九月。

諭青衮咱卜率烏梁海兵隨參贊大臣哈達哈剿阿逆。
青衮咱卜請選兵五萬俟來歲進剿。

諭曰。前聞青衮咱卜諸事迎合阿逆。曾降旨擒治。念其
情尙可恕。旋諭停止。以觀後效。今詢阿逆屬人供稱青

袁咱卜實有以班第薩拉爾奏之處通信阿逆伊旣從中漏洩則聞其叛遁心必惶懼現今所請派兵追剿之說不過藉此姑延時日著傳諭哈達哈遵前旨擒解來京方大軍之剿達瓦齊也青袁咱卜與阿逆同隊交甚暱定北將軍班第與參贊大臣薩拉爾密奏阿睦爾撒納逆狀青袁咱卜微聞之私以相告阿逆旣叛青袁咱卜潛遣烏梁海人諾爾布丹津赴阿逆所至是事發故有擒解之命未幾

上追念其招撫烏梁海功

宥弗究會烏梁海賊郭勒卓輝博博等僞傳阿逆煽哈

薩克阿布賚汗入寇仍

命青衮咱卜以參贊大臣隨哈達哈進剿

命旺布多爾濟隨定西將軍策楞由博囉塔拉進剿阿
逆

賜孔雀翎

皇朝藩部要略卷之七

前史官壽陽 祁韻士 纂

寶山 毛嶽生 編次

江陰 宋景昌 校寫

平定 張 穆 覆審

外蒙古喀爾喀部要略五

二十一年春達爾濟雅偕塔爾瑪善等踰阿爾台剿阿
逆至布拉罕察罕托輝偵知和碩特訥默庫叛分兵屯
和通鄂博哈布塔之伯爾克蘇伯口訥默庫就擒還屯
塔密爾四月車木楚克札布自伊犁縛獻阿巴噶斯哈

丹戚屬請駐巴里坤剿逸賊。

諭曰爾等自去歲效力軍營往返勞頓今不過弋捕逸犯毋庸多人可歸游牧休息。

命復格埒克木丕勒札薩克輔國公爵。

賜雙眼孔雀翎並遣歸牧與德木楚克會緝劫賊。

詔車布登札布以參贊大臣隨哈達哈率師剿哈薩克有固爾班和卓者奇爾吉斯宰桑也攜千餘戶潛赴烏梁海車布登札布車登三丕勒等邀擒之因進兵哈薩克界五月達爾濟雅納木札勒齊蘇嚨等由海喇蘭伯勒齊爾旺剿烏梁海之倡亂者追至庫楚克及哈達什

伯根斬獲甚眾。車布登札布達爾濟雅等迎會哈達哈大軍于哈什拉克。謀哈薩克賊千餘由巴顏山遁。偕土謝圖汗部台吉三都市多爾濟追至伊什勒郭爾及烏拉罕布木巴。汗札爾會掩擊之。斬獲無算。

上嘉車布登札布功。晉封多羅郡王。大軍抵烏梁海。青衮咱卜私攜所部兵還牧。搆逆。且遣赴烏里雅蘇台軍。煽眾喀爾喀。令散歸。輝特逆賊普爾普德濟特等由固都爾格叛逃。齊巴克札布追擒之。復隨參贊大臣納穆札爾捕烏梁海逃眾。至阿固特。賊逸。尾擊之。歿于陣。事聞。

論曰齊巴克札布歿于行陣深堪嘉憫著追封輔國公
賜銀三百兩治喪視一品大臣例賜祭葬入祀昭忠祠
其子巴圖濟爾噶勒襲爵并授札薩克

詔貢楚克札布由翁吉達什和碩解內札薩克馬納烏
里雅蘇台自青衮咱卜屢干重譴

上不忍置之法

恩宥者三至是叛蹟顯著不可復追

諭廷臣曰青衮咱卜受朕恩最深去歲將軍大臣叅奏
阿逆伊敢私自漏洩百計趨承以致阿逆趾高氣揚肆
行無忌後于追緝之時觀望退縮妄言必得兩路出師

五萬方可追擒。種種乖謬。指不勝屈。前此屢欲擒治。念伊祖博貝夙著勤勞。施恩寬宥。今無故自軍營擅歸。又揚言額璘沁多爾濟達木巴札布等治罪之後。眾心疑懼。而喀爾喀數年以來。皆以用兵爲累。以其怨望之私。托爲他人之說。妄行瀆奏。藐法已極。斷難姑容。必當明正典刑。以示懲戒。著傳諭舒明阿蘭泰。如已歸游牧。可諭哈達哈等。旋師往剿。如至舒明所駐地方。卽降旨擒解。青衮咱卜之叛。造僞符。撒汎兵。眾札薩克多爲所惑。延丕勒多爾濟子旺沁多爾濟等。並棄汎歸牧。土謝圖汗部貝勒達什丕勒。亦慮所屬游牧被掠。由烏里雅蘇

台軍營私歸。尋覺其詐。督兵往護臺汛。獨桑齋多爾濟。飭所屬安伍。察獲台吉阿雅喇所匿僞符。札薩克圖汗部台吉遜篤布。與車臣汗部札薩克台吉成袞札布。亦察其詐。安堵如故。初遜篤布等。以檄由德沁札布所至。疑與青袞咱卜通。以聞。

諭曰。僞檄流傳。或係他人假冒。德沁札布之名。亦未可定。著加恩免究。飭令速歸舊汛。接理驛務。毋自貽悞。遜篤布督兵嚴守各汛。誓以死拒。事聞。

諭曰。喀爾喀王公等。爲青袞咱卜所煽。多擅離職守。遜篤布等。特一札薩克台吉耳。獨明大義。不冒附逆。誓死

效力。朕甚嘉之。

賜公品級。以示獎勵。

詔獎桑齋多爾濟之能。授北路參贊大臣。

命往諭烏梁海總管赤倫。協擒青衮咱卜。土謝圖汗部貝勒達什丕勒。復許德沁札布所屬。乘閒劫馬。

詔速擒賊贖罪。車布登將以兵會參贊大臣塔爾瑪善。赴烏蘭嶺。追阿逆。未至。遽由納林喀喇歸牧。塔爾瑪善以聞。

諭曰。車布登係喀爾喀舊人。受恩最爲深重。今乃擅棄職守。私行逃歸。情甚可惡。著擒解來京治罪。以賽因諾

顏部札薩克台吉喇布坦賚克札布額琳沁台吉旺舒克多爾濟守護汎地督牧如故並

賜孔雀翎

命給牧夫口糧示獎自諸札薩克棄汎後驛路中梗軍書旁午不得達經過官吏輒遇害車木楚克札布督兵續遞同部三等台吉噶瓦供給牲畜爲之護送且多捐馬助驛用諸汎之路始通

詔晉封車木楚克札布多羅貝勒

賜噶瓦公品級

諭達什丕勒曰昨聞達什丕勒私歸游牧朕卽料其不

過爲浮言所惑。今果知悔悟。率兵接遞驛務。前咎不足深責。仍加恩晉封郡王品級。但驛站旣係新設。非加意巡察。恐有遲誤。著達什丕勒會同總管達松阿等。悉心辦理。七月宣。

諭喀爾喀王公等曰。青衮咱卜。係獲罪斥革之人。復加恩令襲貝勒。並授副將軍。去歲從征伊犁。封授郡王。稍有人心。自當圖報。孰意深負朕恩。實出情理之外。此次辦理烏梁海。授爲參贊。予以自新之路。伊至烏梁海。並未擒獲鄂木布郭勒卓輝等。卽撤兵還。雖自有哈達哈率兵往剿。伊卽退還。無關輕重。但旣爲參贊。並不奏請。

諭旨亦未咨報將軍率兵擅還律以軍法罪不容誅且妄造浮言煽惑眾聽其心實不可問試思辦理準噶爾一事原爲喀爾喀經理長久之計命將興師以期一勞永逸然選派爾部官兵俱經賞給錢糧米石購辦牲畜何次不給價值而伊乃以連年用兵爲累是誠何心至軍營賞罰乃國家憲典所必行達木巴札布係管理杜爾伯特游牧之人縱令巴朗遁走諱匿不報額璘沁多爾濟監視阿逆來京明知叛跡已著袖手旁觀致令冤脫二人情罪斷無可逭然猶不忍加以顯戮令其自裁此而曲爲寬貸國法何在伊乃謂成吉思汗裔向不治

罪此語舛謬更甚如朕宗室中有犯刑章者朕又何嘗
廢法耶至於稍知奮勉如巴雅爾什第桑齋多爾濟及
車布登札布等則優封顯秩賜資便蕃伊甯不聞之耶
本應除其屬眾削其封爵朕始終眷念舊勳不忍遽令
漸滅所有貝勒爵仍著施恩以額琳沁子輔國公旺布
多爾濟承襲先是眾喀爾喀爲青衮咱卜所煽棄汎私
歸或乘閒肆劫青衮咱卜又分遣其黨誘厄魯特貝子
朋素克公丹拜及烏梁海總管赤倫察達克等與同叛
及聞

諭無不悔悟乞罪七月

詔旺布多爾濟就近擒獻青衮咱卜。

諭曰。逆賊青衮咱卜。背恩叛逆。所襲之爵。自不應復令承襲。但念此爵本係博貝所襲。且效力有年。不忍遽削。著加恩。卽令旺布多爾濟晉襲青衮咱卜所屬盡轄之。哈達哈追剿阿逆。擒達瓦藏布。多爾濟車登始脫歸。哈達哈以聞。

諭曰。去歲伊犁復叛。多爾濟車登力弱被擒。賊退後。他人俱已全歸。伊獨弗至。朕意其順從阿逆。苟且偷生。不獨深負國恩。實爲眾喀爾喀之辱。是以令嚴緝治罪。今覽哈達哈奏。始知其被賊拘留。備經勞瘁。甚屬可憫。著

加恩復其公爵卽隨哈達哈進征哈薩克協理台吉多爾濟亦還

詔封輔國公多爾濟貢格敦丹近族也八月以車臣汗所屬齊木齊格特人肆竊

命參贊大臣納穆札爾等往緝寘之法

諭札薩克等曰朕因爾等不善經理游牧以致盜賊肆行特命大臣前往督緝念皆起于饑寒復令發帑賑給貧戶以贍生業爾等游牧始皆甯謐恐爾等習于玩愒徒知盜賊已除不復爲貧者籌畫生計又或目前尙知約束日久漸至廢弛當各統率所屬詳察貧困之由俾

謀生有策。不至爲非。卽有頑悍不悛之徒。亦當嚴加約束。有犯必懲。務令上下安全。共享昇平之福。延楚布多爾濟不能戢賊。乞避居阿巴噶部界。

詔喀喇沁部貝子瑚圖靈阿。會郡王德木楚克等嚴緝之復。

諭廷臣曰。齊木齊格特人所居。與呼倫貝爾甚近。原係延楚布多爾濟屬。因伊不能約束。妄生事端。若不盡行翦除。地方何由甯謐。著傳諭德木楚克等。查出爲首倡亂之人。卽正典型。餘亦無庸交該札薩克管轄。卽賞給喀爾喀曾經效力之人爲奴。以示懲儆。九月。

命成袞札布復爲定邊左副將軍。先是青袞咱卜陰謀逆。成袞札布首發其狀。

獎賜佩飾。至是偕德沁札布檄調眾札薩克兵丁協剿。復令哲卜尊丹巴呼圖克圖徧諭所部知大義。俾勿爲所惑。

上嘉之。故有是

命。并

諭獎德沁札布著交理藩院議敘。令速合兵擒剿。會哲卜尊丹巴呼圖克圖以青袞咱卜悔罪乞

宥具奏。

詔弗許。青衮咱卜窘懼，爲擁兵自衛計。脅所屬伊克和託輝特巴罕和託輝特明噶特哈柳沁托斯奢集努特六鄂拓克及烏梁海十六鄂拓克附已。大兵至，皆棄去。青衮咱卜攜孥由托濟走斯吉特，謀遁俄羅斯。

諭旺布多爾濟爾必無與逆賊同謀之事。朕可深信。昨據貝勒車布登札布屬人告稱逆賊令遷爾游牧。爾雖聽從，並非有心附之。今大兵已抵和託輝特。爾若能擒獻，朕必加重賞。否卽率屬速赴軍營，既可永受朕恩，且不墮爾祖博貝舊勳。況青衮咱卜屬人，不過脅從。若棄之來歸，概免治罪。爾其熟思審慮，善自爲計，毋貽後悔。

丹津來朝。

賜雙眼孔雀翎黃馬褂。

命乾清門行走克什木等就擒齊巴克雅喇木丕勒及格埒克木丕勒自伊犁還。

諭曰郡王齊巴克雅喇木丕勒當逆賊倡亂時能奮勇擊賊馳援班第朕甚嘉之著加恩晉封和碩親王遣歸游牧以示體恤閏九月。

授桑齋多爾濟所部副將軍。

諭歸游牧嚴緝棄汛肆劫逃兵車木楚克札布解送駝馬助軍。

諭軍需項內折價賞給

命副都統濟福赴車臣汗部會汗嘛呢巴達喇緝所部劫賊適嘛呢巴達喇疾濟福以聞

諭曰嘛呢巴達喇年幼不更事今旣染疾無庸俟其會緝伊同族郡王德木楚克現由軍營遣歸游牧著協同辦理青衮咱卜之叛獨嘛呢巴達喇所屬台吉達瑪琳率子塔木楚克約從兄無擅離軍汛者

詔諭獎之琳丕勒多爾濟自科布多軍營調赴庫倫協理俄羅斯邊事十月成衮札布奏多爾濟車登孛與逆賊同居應令由軍營速歸牧示所屬毋惑

從之。冬成袞札布集諸部兵追剿青袞咱卜。以車布登
擅歸游牧。復詭病不從。剿青袞咱卜請削爵論死。

詔削貝勒宥死。復劾齊巴克札布不赴調。

詔削公品級。

授巴勒達爾爲所部副將軍。初青袞咱卜之叛。檄杜爾
伯特兵赴軍。賊揚言將盡擒喀爾喀王。公治罪。巴勒達
爾以游牧密邇和託輝特。懼禍私歸。

上鑒其無他。

詔成袞札布

諭弗疑懼。令協剿青袞咱卜。遂有是。

三
命十一月成袞札布遣參贊大臣納穆札爾輕騎往追
旺布多爾濟亦率兵從至杭哈將噶斯擒青袞咱卜及
其子車蘇隆多爾濟齊旺札布巴里械送京師賊平解
德沁札布參贊大臣職十二月

諭曰親王成袞札布奉命討罪實心效力迅奏膚功朕
甚嘉之著賞杏黃帶封伊第四子占楚布多爾濟爲世
子以獎忠勤尋

命占楚布多爾濟代掌札薩克青袞咱卜之叛也其部
貝勒車登札布助逆

上命二賊就擒後籍所屬給成袞札布及弟郡王車布

登札布等成袞札布奏和託輝特屬六鄂拓克並烏梁
海十六鄂拓克聞大兵至卽解尙知感戴和託輝特輔
國公旺布多爾濟係貝勒博貝嫡嗣輔國公多爾濟車
登台吉達什朋素克係博貝從子皆未附逆請令轄青
袞咱卜屬至車登札布助逆時台吉諾爾布曾經諫沮
弗聽乃率眾台吉馳赴烏里雅蘇台軍汎訴世受
國恩誓不從賊因率屬由博羅哈卜齊爾赴察罕托輝
游牧供應駝馬亦極奮勉請授札薩克令轄車登札布
屬庶伊等不致離析各札薩克知感自必嚴加鈐束
詔獎協機宜如議行

二十二年正月青衮咱卜伏誅諸子皆連坐

特旨宥其幼子巴里

諭曰逆賊青衮咱卜親屬理應概予駢誅但念伊祖原封貝勒博貝之妻巴勒津年逾八旬孤苦無依博貝曾著勞績不忍令其絕嗣著加恩令巴里與之同居免其正法以示朕格外優恤至意

詔授賽因諾顏親王成衮札布定邊將軍統大軍赴巴里坤剿輝特逆賊巴雅爾

諭曰將軍重任甚難其人成衮札布熟悉蒙古事宜且深感朕恩誠心報效著授將軍印賜整裝銀五千兩伊

子弟有願隨往者聽其指名具奏。此次進兵非初進伊犁可比。現在賊勢窮蹙。擒剿甚易。成袞札布勤勞已久。毋庸久駐行間。以示體恤。成袞札布長子一等台吉額爾克沙喇從剿。

詔封輔國公。春遣車臣汗部公達爾濟雅歸牧。尋

諭偕副都統濟福會緝所部劫賊。弼齊罕扣等于色布蒐勒。復由鄂煖郭勒擒賊塔瑚資。

命土謝圖汗部額璘沁多爾濟兄根札布多爾濟復世爵。改爲札薩克固山貝子。根札布多爾濟敦多布多爾濟長子。康熙末尙郡主。授和碩額駙。五月。土謝圖親王

桑齋多爾濟獲弁汎兵二十七人寘于法

命徧諭汎兵知之五月授札薩克圖汗貝勒旺布多爾濟副盟長六月旺布多爾濟隨大軍由巴里坤擒準噶爾叛賊呢瑪于阿爾察圖山

諭獎其功

賜郡王品級八月土謝圖汗部公車登三丕勒駐防翁固爾諾爾有台吉達瑪琳者其族也附青衮咱卜叛副將軍親王桑齋多爾濟率賽因諾顏郡王車布登札布等奉

詔往擒未至達瑪琳遁車登三丕勒偕協理台吉占楚

卜由翁固爾諾爾馳追縛以獻桑齋多爾濟遣兵解赴京師並獲

獎賜車臣汗郡王巴雅爾什第偵所部劫賊什等竄呼倫貝爾之西墨爾根哈瑪爾偕同部郡王德木楚克公格埒克巴木丕勒等掩擒之置之法敘功加一級

賚幣

賜德木楚克三眼孔雀翎貝子延楚布多爾濟以溺職詔削爵車木楚克札布偕唐喀祿奏言杜爾伯特貝勒巴圖博羅特公舍稜台吉阿喇善等通阿逆走額爾齊斯不從其汗車凌徙牧臣等偵得狀偕副都統瑚爾起

馳赴輝巴郎山後擒巴圖博羅特并剿烏梁海賊五十戶乃旋兵赴塔爾巴噶台緝哈薩克錫喇

諭嘉其能和衷且協機宜以

御用佩飾賜之飭敘加級秋達爾濟雅扈

駕木蘭行圍授副盟長九月

諭車木楚克札布偕車布登札布招降烏梁海宰桑博和勒納木札勒等札薩克圖汗部已革輔國公多岳特單騎赴濟伯拉克堡偵賊爲所窘不屈歸

詔授三等台吉

賜公品級烏梁海內大臣察達克率兵四百往招車木

楚克札布檄布延圖兵百繼進。盡降之。有特勒伯克札爾納克者。阿勒坦諾爾之烏梁海宰桑也。聞之。亦攜屬至。

詔車木楚克札布定貢賞例。宣示德意。九月。車布登札布請遣烏梁海大臣察達克。率兵四百。往招烏梁海博和勒納木札勒等。復由布延圖軍。選兵策應。

上韙其議。十月。

諭曰。車布登札布辦理軍務。皆合機宜。較前大有進益。明歲進兵。著授兆惠爲定邊將軍。代成袞札布。而以車布登札布爲之副。卽來京請訓。喀爾喀王公內。有能協

同辦事之人伊卽指名具奏毋庸派兵但將親隨人役酌量足用仍加恩賞銀二千兩以備整裝之用成袞札布世子占楚布多爾濟卒

命其長子輔國公額爾克沙喇代掌札薩克

詔賽因諾顏親王德沁札布購馬解軍同部貝子諾爾布札布獻馬助軍得紀錄尋

賜雙眼孔雀翎一等台吉公品級齊旺多爾濟以病不能赴軍請獻馬五百免給值

上嘉其誠

賜貝子品級十一月旺布多爾濟卒于軍土謝圖汗部

一等台吉三濟札布亦以疾卒成袞札布以聞

諭曰旺布多爾濟及三濟札布久駐軍營黽勉行走前
會降旨令歸牧休息今已溘逝深堪憫惻著加恩以旺
布多爾濟之子車都布襲貝勒仍賞郡王品級賜銀五
百兩治喪三濟札布之一等台吉亦令伊子三都布多
爾濟承襲并賞公品級賜銀三百兩治喪車布登札布
奏札薩克圖汗部輔國公彌什克老成練事請遣護杜
爾伯特游牧

從之授札薩克圖汗部輔國公多爾濟車登所部副將
軍參贊

詔札薩克圖汗部一等台吉根敦偕參贊大臣唐喀祿
護侍衛松達納赴哈薩克授札薩克圖汗部二等台吉
達什朋素克札薩克二等台吉析青衮咱卜屬

命轄之初青衮咱卜叛馳報烏里雅蘇台軍令設備敘
功故有是命

詔札薩克圖汗部一等台吉諾爾布駐防布延圖額德
格特汎車布登札布奏派土謝圖汗部公品級札薩克
台吉三都布多爾濟一等台吉齊旺札布賽因諾顏部
札薩克台吉達什一等台吉敦多卜四等台吉庫爾奎
等隨征聽調

從之十二月成袞札布來朝

諭曰成袞札布世篤忠貞夙諳軍旅前曾授定邊左副將軍永居邊陲嗣因巴雅爾作亂授定邊將軍統兵進剿朕思北路軍營關係甚重自平定伊犁以來拓地廣遠統轄匪易今復授爲定邊將軍駐守烏里雅蘇台統領官兵綏柔邊境其勗之賽因諾顏部貝子福保自伊犁歸雍正間爲準噶爾所掠至是賊平始得歸

賜公品級先是福保陷賊其兄沙克都爾札布代襲貝子福保貝勒恭格喇布坦第四子十二月

諭曰車木楚克札布數年宣力戎行勤勞懋著近復招

降烏梁海。善爲撫納。著晉封多羅郡王。賽因諾顏部札薩克一等台吉額墨根卒。子達什襲。是年。車臣汗部公格埒克以病罷。子貢楚克多爾濟襲。以和託輝特逆賊青衮咱卜旣誅。

諭札薩克圖汗部諸札薩克曰。前因青衮咱卜負恩背叛。散布流言。眾喀爾喀間有煽動。經朕訓諭。爾等旋知悔悟。各奉職守。今逆賊就誅。黨附人等。應分別治罪。以彰國憲。但爾等爲國家臣僕百餘年。誤聽浮言。致干罪戾。並非有心附賊。免其查究。嗣後益宜仰朕恩。湔滌前愆。約束所屬。各安本業。綏靜邊隅。長享太平之福。

二十三年正月

詔授郡王車布登札布定邊右副將軍。隨將軍兆惠由巴里坤進剿厄魯特餘賊。及逆回霍集占。二月土謝圖汗部被災乏食。

詔遣都統多爾濟齎銀萬兩賑之。土謝圖汗部親王參贊大臣桑齋多爾濟赴庫倫。協理俄羅斯邊境事。阿睦爾撒納竄斃俄羅斯。獻尸至界。

詔土謝圖汗部郡王齊巴克雅喇木丕勒馳赴恰克圖驗視。定邊右副將軍親王車布登札布奉

命進兵哈薩克。索叛賊哈薩克錫喇及布庫察罕以土

謝圖汗部札薩克三都布多爾濟數著戎績奏請隨往
允之車臣汗嘛呢巴達喇札薩克圖汗部郡王巴勒達
爾來朝並

命乾清門行走

賜嘛呢巴達喇三眼孔雀翎黃馬褂及紫轡尋偕桑齋
多爾濟緝獲劫賊阿弼斯瑚等

賚幣三月

賜定邊左副將軍親王成袞札布銀千兩

命攜拏赴軍車布登札布率兵至伊犁時叛酋阿睦爾
撒納竄死逸賊阿巴噶斯哈丹舍稜布庫察罕哈薩克

錫喇等未就擒。車布登札布奏遣兵赴喀什崆格斯搜
逸賊。

諭曰。此等處所。伊犁進兵時。俱已經過。何必重勞馬力。
現今阿巴噶斯哈丹及舍稜等。俱未殲除。殊屬不知緩
急。伊等當自知愧悟。益加奮勉。車布登札布奏請赴塔
爾巴噶台偵緝舍稜。

諭曰。當舍稜初遁時。伊等若卽尾追。又有和碩齊堵截。
必爲擒獲。今已逋逃兩月餘。豈尙在塔爾巴噶台坐待
追兵耶。可速赴額爾齊斯。與成袞札布等協力會剿。尋
諭赴博囉塔拉。緝阿巴噶斯哈丹。布庫察罕。哈薩克。錫

喇毋庸復至額爾齊斯。車木楚克札布奏。偕察達克勘
烏梁海戶口。其得秦有十餘戶。二十餘戶。不等。分置得
木齊收楞額等員。請并戶少者。約四十戶。編得秦一
上知其悉烏梁海情。

詔如所請。四月。車布登札布。率賽因諾顏一等台吉達
什等。至伊犁。捕厄魯特餘賊。以土爾扈特台吉舍稜遁
俄羅斯。

詔成袞札布。赴科布多。會剿。時成袞札布。已領兵三百。
赴布延圖。追剿。奏至。

諭獎之。夏。三都布多爾濟。偕侍衛庫爾圖。率五十騎。爲

大軍導至和落霍斯偵賊據高岡夾擊之賊棄岡遁追剿至昭達里克賊眾盡降馳疏告捷

賜孔雀翎凱旋以土爾扈特台吉舍稜勞章札卜等叛逃偕副都統鄂博什引兵百馳追之至伊蘭博羅特圖喇偵竄俄羅斯乃還烏梁海總管阿拉善攜戶百餘叛逃賽因諾顏部郡王品級車木楚克札布率札薩克圖部公多岳特追擒有車根者亦烏梁海總管也縛獻阿拉善收其眾烏梁海人恩克叛逃

命成袞札布調諸部兵擒獲並

賜銀幣尋

諭札薩克圖部公多爾濟車登偕參贊大臣福祿緝烏
梁海劫賊布爾古特布格等擒之並蒙

獎賚時烏梁海賊阿木古朗等劫馬札薩克圖部札薩
克達什朋素克護所屬福祿劾之

詔削札薩克留軍效力尋隨福保追擒阿木古朗等寘
于法

詔宥前罪仍授札薩克靖逆將軍雅爾哈善剿庫車逆
回札薩克圖部一等台吉朗袞札布偕台吉額琳沁率
兵八百繼進由巴掄沙札爾至積噶托果納擊賊援兵
斬獲甚眾

晉封鎮國公。

詔奪俸。時賽因諾顏參贊大臣親王德沁札布緝獲盜馬賊瑪塔克加級。

資幣六月車布登札布奏收服烏魯特得木齊托羅和卓六十餘戶于喀什河

諭卽策應兆惠會布庫察罕爲哈薩克部人察哈瑪巴圖爾所擒

諭曰前諭車布登札布不必往追舍稜俟擒布庫察罕等卽策應兆惠今聞布庫察罕見擒于哈薩克則哈薩克錫喇亦必竄伏其地車布登札布速由塔爾巴噶台檄諭哈薩克阿布賚汗將哈薩克錫喇一體擒獻先是哈薩克錫喇及宰桑鄂哲特等潛遁和落霍斯聞追急度不得脫悉眾據高岡侍衛瑪琥等以我兵少請待其走攻之車布登札布持不可麾兵進擊擒鄂哲特哈薩克錫喇僅以身免斬獲甚眾捷聞

詔以其父超勇號賜之。

賜達什公品級。

命車木楚克札布護理盟長印。偕親王成袞札布剿詭降之土爾扈特台吉舍稜。偵遁俄羅斯。乃還。七月鄂哲特械至。供稱副將軍車布登札布身先士卒。所向無前。上愈嘉歎。

賜金黃帶。

諭曰。車布登札布奮勇剿賊。以少克敵。不愧超勇之目。前者舍稜逃遁。伊未及尾追。諒因不能兼顧。亦事勢使然。此時布庫察罕料哈薩克自必縛獻。惟聞哈薩克錫

刺逃西哈薩克部之特柳克。參贊大臣富德。兵少窮迫。似屬可虞。昨諭車布登札布策應。自應前往。但亦須酌量馬力。儻有不足。卽撤兵。與富德暫回伊犁。再圖進取。朕於他人。每降旨督催。伊天性勇往。故降此旨。著傳諭知之。是月。車布登札布由固爾班察爾進屯阿布勒噶爾。哈薩克縛獻布庫察罕。車布登札布因請馳赴阿克蘇。策應將軍兆惠。

命還駐伊犁。晉親王品級。八月。車布登來朝。

諭曰。原封貝勒。車布登係附和逆賊。青衮咱卜之人。原應按律治罪。朕因其平日爲人愚昧。又年老可矜。從寬

祇令削爵。仍許其子承襲輔國公。伊悔罪感恩。抒誠入覲。念前此曾經宣力。積有勤勞。著加恩賜公品級。遣歸游牧。九月。

諭曰。撫定回部。已有兆惠。納穆札爾等。自易竣事。車布登札布軍營效力已久。撤兵後。卽歸游牧休息。烏梁海總管阿拉善恩克等。叛竄車木楚克札布。偕札薩克圖汗部公品級多岳特。分剿阿拉善及恩克屬。就擒謀恩克。竄哈屯河。疏請暫歸阿勒和碩屯駐。冬雪後賊必就擒。

許之。十二月。成袞札布奉

詔購駝馬解巴里坤。

授三都布多爾濟所部副將軍參贊協理俄羅斯邊境事。尋署副將軍。以擒獲厄魯特逃賊珠卓木等。

賚幣車木楚克札布果擒恩克。

賚幣。是年土謝圖汗延丕勒多爾濟卒。從子車登多爾濟襲。